

寒松堂詩集(二)
漁洋山人秋柳詩箋



寒松堂詩集

二

顧象福著

王雲五主編
叢書集成初編
寒松堂詩集及其他一種
二 冊

中華民國二十五年六月初版

翁邢

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

(本書校對者湯蔭人)

寒松堂詩集卷二

詩自壬子至甲子

壬子閏七月七日乾清門引見恭紀

應召重來謁帝閣。晨趨彷彿舊臨軒。同瞻北闕知天近。乍識宸顏荷語溫。雨散禁城衣尚溼。前夜大雨風迴左掖日初暝。清時豈合容樗朽。虛負徵書一代恩。

入都次孫徵君鍾元先生見懷韻奉答二首

夏峯遙望幾春秋。三尺苔痕帶雪留。但得峯前分片席。何須更羨五湖游。翩翩鳳翮脫樊籠。啓後承先賴此翁。自顧頭顱渾似雪。上林猶自問丹楓。

送申隨叔太史假歸兼訊臯監觀仲

一臥蘿山鬢已華。喜從京國問煙霞。廿年兄弟真吾友。一代文章更幾家。大業忍辭青玉案。宦情多在碧雲涯。故園叢菊應無恙。共看長天鴈影斜。

題王敷五編修兩世節壽冊

稔知鄉國有名門。世節能兼世德存。一派淵源推鼻祖。百年甲第兆秋元。燈前晝荻霜痕見。月底翻書篆

迹昏好著萊衣雙進酒。聖朝應念兩高萱。

許生洲庶常招飲雙松下因賦二章

古柏森森卻類松。相傳此地有雙龍。蟠根合向幽人宅。對雪疑看大茂峯。午夜寒濤流紫陌。四時元氣入黃鐘。長安多少繁華夢。肯撫蒼鱗過一冬。牆東有客賦高松。昨夜詩成度晚鐘。座上揮毫人似玉。庭前踏月影如龍。呼來獨鶴稱三友。抱得雙虬占一峯。欲向西臺移汝去。不妨長夏作嚴冬。

壬子除夕

長安風物異家園。此夕愁多合閉門。天祿未叨終竊祿。君恩難報愧知恩。年華一任星霜改。血性空餘涕淚存。願我迂疏還自責。太平時節慎多言。

癸丑正月二十日扈從南苑觀八旗品官大蒐賜宴恭紀

萬國車書一戰中。太平諸將尙彎弓。從知聖主崇文德。還念高皇重武功。甲冑煌煌雲共白。旌旗閃閃日分紅。廟堂元有經邦略。慚愧儒生賦大風。

送杜振門總憲予告歸里

螭頭曳履幾星霜。一賦歸來鬢未蒼。風度兩朝持國是。冰操五夜告君王。老臣去就人難識。知己追隨夢

獨長。卻愧掖垣聽鑰後。又騎驄馬逐班行。

送李召林侍御左遷信宜令四首

一入烏臺已讓君。夜來把酒喜論文。風霜懷懷窗前發。諫草應從此處焚。此初略時作也。今錄而送之。結句非泛然贈答云。

野鳥高枝報曉衙。山城雞犬幾人家。省耕不用騎驄馬。且效河陽看種花。

儋耳先生海外詩。使君車過讀遺碑。浮雲萬里心孤月。正是當年動忍時。子瞻居儋。有浮雲時事。改。孤月寸心明之句。

折柳河橋慰語頻。長沙曾藉少年人。君恩浩蕩應難測。珍重熙朝諫議身。

癸丑六月九日。上幸瀛臺。特召諸王大臣內閣部院九卿翰林科道各官。泛舟觀蓮。賜宴恭紀。

湛露深深太液池。宸鑾一出倍清漪。樓船影瀉香荷動。鵷鷺情歸碧岸遲。玉釀幾回斟琥珀。天庖分席列罍彝。臣心敢負明良會。獨愧嘉謨答聖思。

送王蓼航同年分憲贛州

北闕晴雲遶鳳城。先皇開館集羣英。四十九人相接席。槐音日日雜書聲。是時畿輔稱絕調。更兼齊魯才華妙。嵩陽特鍾三禮家。風流儒雅推逸少。秦風唐風未足多。忻隨公等度鑾坡。一朝步入梧桐掖。封事中宵想玉珂。嶽崎磊落誰能比。論公姓字芬牙齒。斗酒能吟詩百篇。逢世卻無一片紙。仕局紛紛那復言。詞臣外擢忽新恩。單丁豈合違母側。烏鳥終當報至尊。余送君歸官亦謫。母氏念兒雙鬢白。陳情得荷聖人

知與君俱遠。長安迹。慈闈先後去高堂。兩家千里淚痕長。鮮民空有微軀在。幾時奔走答君王。壬子余方應召出。大梁有司亦敦促。膠州前來公後來。癸丑重逢三丙戌。兄弟相看總二毛。不歌不哭笑聲高。兒婚女嫁從容說。有時長嘯一揮毫。揮毫興酣風雨落。九州老氣無今昨。彷彿淇澳竹萬竿。颯颯秋空一掃籜。座上飛傳除目來。麻姑五老借公才。天子有命留不得。長江簫鼓畫船開。行矣行矣懷難寫。此人真去虔州也。旣不置之石渠天祿間。何不留對夏峯先生者。行矣行矣懷難寫。

吳耕方監丞因三世官國雍。追憶先澤。賦詩有感。余讀而贈之二首。

先輩芳型拜且歌。毘陵家世近如何。只今聖主興文教。碑版應存舊澤多。

一代貽謀一代師。高風亮節總堪垂。正當繩武淵源日。好記先皇首拔時。戊戌。章皇帝御試丁酉南闈。拔吳第一。是年特賜進士出身。

送張素存太史歸省。兼訊其尊人公選吏部。

文章德業舊通家。幾世名題御墨斜。彩筆故承蓮燭近。白雲卻望鐵城賒。多君有屋藏金鑑。愧我無詩附雪槎。到日高堂如問訊。爲言頭白客京華。

送許典三之海甯令

鄴下有許子。家學篤懿行。萬物一體願。良由性所生。俎豆表先德。孝子動鄉評。以此真淵源。紹述推令名。一出宰百里。志不欺愚氓。行將溥聖澤。庶克振家聲。扁舟渡江去。竹馬歡相迎。歌曰我公來。笑比黃河清。

君子有惠心。虞芮永無爭。三年報新政。飛鳧觀厥成。夏峯尉素誼。鄱南訂生平。熙朝重經術。觀面卜公卿。書沈繹堂侍讀五十初度卷

臚傳曾記拜丹墀。學士才華聖主知。宏德殿中揮翰日。乾清門外賜貂時。元因講幄需名碩。不爲詞壇表令儀。滿地黃花人半百。愧無佳句佐金卮。

送李厚庵編修假歸

太史起閩海。妙姿稱殊尤。行年未三十。志追濂洛儔。曾讀太極說。歷歷見源頭。退而返厥躬。千載適相侔。況復藉師資。所學獲所求。吾道久榛棘。頽靡良深憂。晨夕一靜對。衰颯獨貽羞。竚望登先岸。歸來佐聖修。送徐健庵編修歸里用騎字韻

秋風霜鬢老將垂。送別同人意每遲。鳳嘯中朝三瑞羽。馬鳴歸路一輕騎。多因菽水辭兄弟。定有文章紀歲時。日抵家園陽氣復。江城草色綠離離。

送張淡明侍御外轉分憲太原

自是西臺老諫臣。幾年同列倍相親。胸中涇渭千人見。筆底風霜一味真。敷政憐才勞聖主。推賢讓德動朝紳。只今暫借澄清略。早晚徵書下紫宸。

壽徵君孫鍾元先生九十

金容家世舊儒宗。四海淵源一派中。膝下曾孫承德訓。門前弟子坐春風。純修妙合程明道。睿學全追衛武公。聞說當身渾太極。年年遙拜歲寒翁。

玉泉山爲帝京形勝。賈膠侯佐司空時。力罷燒灰。賦詩美之二首。

玉泉山下玉泉流。萬斛盤旋入御溝。乾柱那容施斧鑿。龍蟠虎踞帝王州。初心不是建勛名。西北高峯一力爭。煉石補天猶幻事。好留屏障護神京。

李恆嶽妻兄自蔚來訪。喜而贈之。

握手東莊一載餘。勞君遠過旅人居。晚年難得同心侶。夜話如看太古書。顧我廉名承義重。於今言路報恩疏。祇應蚤晚歸休去。莫累高賢更拮据。

陳六息先生刺蔚有惠政。壬寅祠名宦矣。及得乃弟長卿書。因知先生於壬寅辭世。追憶有感。卽贈

公子伯際。

楚水燕山兩地懸。頻因舊好憶當年。甘棠幾樹分餘蔭。手澤盈箱啓祕編。白髮驚看難弟在。青雲喜見後人傳。千秋俎豆尊夫子。門下樗材愧大賢。

戊戌與紀伯紫別。各有詩。垂二十年矣。都門重晤。以魏文靖公文集見貽。意有在也。感愧志謝。仍用舊韻。

垂老依然學道心。回看景物倍蕭森。人經離索肝如雪。話到修爲語似金。先輩典型誰敢望。吾生迂闊愧尤深。開函卻向燈前讀。一夜空窗奏古琴。

題法黃石同年壁間畫

憶昔瀛洲萃大文。膠州太史邇不羣。有時作賦齊班馬。亦或揮毫比右軍。此來非復天祿石渠之舊席。獨有西山北海供吾筆底之煙雲。高陽李子年最少。潑墨臨池屬同調。爲公寫出萬壑心。一坐一臥視而笑。魏生也向壁間遊。徒將老眼窺二妙。

夏旱奉旨祈雨。卽日步禱雨降志喜。

四月十九日。

郊圻赤地望甘霖。民瘼時關聖主心。夙夜自慚荒尹職。虔誠實恐負綸音。行看黶黷蒸雲起。立對氤氲布澤深。溼透衣袍泥尺許。歸來擬獻太平箴。

口占送甯元著侍御罷職歸里

盛世言何諱。臣鄰拜復歌。一封惟自信。百折總無他。諫職終難盡。君恩感更多。歸家先慰母。午夜憶鳴珂。

送林穆之訪弟皋思兼懷二史

君家好兄弟。談笑盡文章。拓落思千里。窮愁賦七襄。酒消燕市月。人飽鴈門霜。計日兵戈息。他鄉亦故鄉。

送張羽王侍御請告歸里

誰能仕宦卻閒閒。長日春風自掩關。歲月有情留客住。煙霞無恙待人還。清時柱下虛言責。好友林中共笑顏。時念藝文伯甫。綴雪樞玉。鉉金鑑諸公俱居里。歸去不須尋舊夢。羲皇以上是青山。

寄祝魏貞庵先生六十初度用元韻

十年難得一樽同。綠野堂高罨畫中。相業久從黃閣著。儒修只見紫陽崇。躬耕百畝惟家食。口授諸生卽聖功。憂國有心頭更白。駐顏還在菊花叢。

爲復聖裔顏先生暨夫人壽

鹿門偕隱幾經年。酒泛黃花共一筵。勝國遺書存孝子。興朝女史勒鴻編。簞瓢家法依然舊。博約工夫正可傳。金馬容臺雙戲綵。翩翩舞向岱雲邊。

題同年上官三立畫卽送歸里

薊北風霜十月寒。驚聞有客去長安。臨歧執手無他說。屬予爲題九畹蘭。予曰唯唯心已許。披圖視之香欲吐。此花自是君子儔。從來不與蕭艾伍。中丞第宅築高軒。兄弟依依笑語溫。風晨月夕時展玩。應念同人筆墨痕。

壽錫伯長兄卽用來韻

每逢初度歲將新。臘雪寒梅物外身。學稼久知兄有志。司農獨愧弟爲臣。燈前課子消清夜。園裏栽花樂

舊貧。兩地無由躬致祝。年年詩報上林春。

題李湘北學士畫冊

竹杖芒鞋落落遊。夜深纔下讀書樓。牙籤萬軸應無忝。獨許前身是鄴侯。

輓富川令劉君死節次葉訥庵司業韻。

君諱欽鄰。字江屏。江南儀徵縣人。辛丑進士。

千秋完節日。星明舌斷猶聞罵賊聲。漢水秋高勞將士。富川血碧動公卿。魂依北斗升還降。廟食南蠻死即生。聖主方憐臣義重。定教青史大書名。

輓張幹臣學士二首

爲奉徵書滯旅亭。燕山昨夜掩文星。朝廷正惜真廉恥。吾道先摧古典型。病榻披衣猶望闕。

元日。肅朝服拜闕畢。病乃劇。

孤兒執手尙傳經。

彌留時。惟口誦仁人。心也。義人路也。二語。

皇天忍奪清剛氣。欲起斯人問渺冥。

自是冰心玉骨人。豈從今日蓋棺真。十年道誼神相往。數則箴銘筆尙新。爲痛死生關世教。倍憐出處動朝紳。講堂依舊廬山腳。多少生徒入夢頻。

五月廿九日。沈繹堂祭酒。王子言。崔玉階。陳說巖。三學士。葉訥庵侍講。同集可亭。讀繹堂進呈御屏

銘。訥庵贈成給事詩四十韻。因用說巖見貽舊韻紀之。

神皋五月草初青。

時大旱。

客有車音過可亭。經國大文傳百禩。立朝清望重當廷。懷中謾賦憂時句。座右高

懸作聖銘。聞道九重勤講幄。太平金鑑在談經。

爲徐太夫人六十壽。兼贈健庵果亭兩編。修立齋學士。

西鹿城邊紫氣迴。階前玉樹映三槐。問安齊照金蓮燭。進酒同分內殿醅。續襃霜闌千縷就。經傳午夜一燈開。諸孫況復承家訓。多少恩光次第來。

爲陳封翁壽。兼贈說巖學士。

王屋青連瀟澤春。遙看秋色更嶙峋。鹿門松菊開三徑。楚畹芝蘭種幾巡。華國文章傳玉樹。過庭人物立楓宸。相期大業千秋上。不獨榮名報所親。

輓蘭溪丞徐君攝篆武義盡節

名諱。山西廣昌縣人。貢監。

寇盜縱橫甚。朝廷法度寬。幾人明大義。一死到微官。血性千秋熱。詩書此日完。梁間三尺帛。留與士民看。

輓大司農米公諱賜翰

計部尙書古大臣。不才五月忝同寅。持籌共念輸將苦。切齒難忘寇賊頻。社稷憂勞惟此日。朝廷倚賴少斯人。百年生死真無定。話到清剛淚滿巾。

輓神木僉憲楊茶庵盡節

名三知。直隸良鄉人。丙戌進士。

幸吐吾儒氣。同人莫歎嗟。一身酬魏闕。萬姓哭公衙。罵賊空留舌。招魂不到家。朱溫何日滅。遺恨逐黃沙。

張德軒少廷尉索題百壽公新園

聞說王公第。君恩到翠微。樓臺千樹直。池沼一鴻飛。徑轉雲隨騎。筵開花照衣。庭前風日好。彩筆賦春暉。

裕親王新園成。令諸卿貳分箋賦詩四首。

別業初開邸第邊。恩光春色擁神僊。輔成聖德文章貴。疏散西園禮樂偏。嘉樹雲衣停夜雨。清池石髮帶春煙。德容自許昇平會。喜近君王大被眠。天家樂事復何如。日近新恩帝子居。早爲朝廷除大寇。頻因顧問購奇書。人來玉樹連星動。花散銀牀帶雪疏。共道賢王知儉德。退朝不上紫香車。鑿池半畝近山阿。引出漣漪自御河。石動花陰迎淑氣。魚寒春水戲銀波。飛觴釣曲谿雲落。洗硯沙痕墨雨多。錦幔移來封十里。行行幾處起笙歌。碧洞丹梯二月開。西園賓客報春來。看山車馬披雲出。聽曲絃歌待漏回。怪石移將鄰鄰水。杏花飛去滿燕臺。朱門自有枚生在。七發能無作賦才。

送朱生歸江西。因祝其母。

海內說豫章。理學稱淵藪。近得張廬陵。清剛真吾友。志不讓皋夔。言動無一苟。先後起田間。頗惜交未久。旅舍見朱生。名渠籍江右。廬陵取此人。從游諒非偶。欲歸叩我門。再拜乃啓口。願乞一二言。攜去報吾母。

備述慈孝行。艱苦事井臼。問年登古稀。米從千里負。余曰其賢哉。是母是子有。學道卽顯親。甯必言爲壽。堂上聞詩篇。可信魏生否。

都門送解法周同年歸里

太平景色憶吾鄉。聞得君來喜欲狂。今昔愁懷都是夢。弟兄老鬢總如霜。膝前玉樹連枝發。門下淵源一派長。惟願東山高臥穩。蕭然四壁有餘光。

聞嘉定令陸稼書有賢聲。心竊敬之。與陸武園侍御。

熙朝重守令。宵旰憂斯民。吏道雖云雜。天下豈無人。近聞陸嘉定。平生志清貧。下車甫一載。惠政獨循循。歡聲動萬戶。異績傾朝紳。江南財賦地。知爾勞心神。軍興正旁午。輸將彌艱辛。前令留餘蠹。於今見陽春。盟手寫荒言。始終願自珍。君子貴彝好。甯取面相親。又聞宗閩洛。義利別纖塵。趨向不敢定。踐履惟天真。南北此心理。黽勉若比鄰。異時覘所學。霖雨佐楓宸。

寄懷黃州太守于北溟。與陳省齋戶曹。

那能覲面識于公。十載懷君夢已通。骨帶清霜撐陋俗。化行春雨起頽風。朝紳推服千秋上。兆姓歸依一念中。聞道黃州羣寇息。誰將直筆勒奇功。

爲洪洞范進士母郇太君七十壽二首

久向婁山號女宗。安貧樂道舊家風。晨昏授與兒孫訣。文字都歸性學中。
陳情表上意何如。報母惟將數卷書。不是聖朝真錫類。肯教國士奉潘輿。

題江氏雙節冊子

士女呼難鳴。內則式克篤。一朝失所天。自矢不食粟。匪石何可移。未亡聊復足。
堅貞蓄善氣。松筠節相續。一門懷冰霜。清光照幽谷。荻灰小篆分。繞膝人如玉。君子貴懿行。百年繫風俗。

送成我存掌科告病特旨優遣歸里

冰心十載對楓宸。勅旨優隆到小臣。點綴朝班人漸少。支離病骨爾爲真。
歸舟載月辭垣掖。客舍留書佐俸薪。贈余古書數卷。願我年來頭半白。倍因宵旰鼓精神。

衛枚吉樞部請假歸曲沃侍母

請急欣逢設帨辰。少君今作太夫人。當年司馬門庭肅。此日樞曹孝友真。
月度嬭闌千里夢。風搖玉樹一家春。景明山色華筵外。照得萊衣綵更新。

哭贛榆令王元夫名之旦。曲沃縣人。辛丑進士。在任二年卒於官。

平生砥礪幾多年。向我還求一著鞭。濂洛淵源歸正派。黉黃治績邁諸賢。
天留此吏方無憾。道惜斯人竟不傳。有淚更從何處哭。笥中檢取大儒編。元夫令贛榆。初梓白鹿洞規。呂氏藍田鄉約諸書。乙卯重刻。曹月川先生夜行燭。贛俗一變。

讀呂忠節公年譜遺集感其家世追而弔之二首

勝國名家踐履真。文章節義貫秋旻。十三經內尊惟孝。千百年來道在人。洛水無兵誅亂賊。新安有墓葬忠臣。遺書讀罷衣冠肅。欲拜先生續獲麟。

先生墓孝經大全進呈行於世

絕學千秋道德真。吾儒正氣達高旻。追思奧蘊歸前輩。嗣續淵源屬後人。三世流傳多大節。一門慘烈幾孤臣。當年國事需才急。徒向中原哭鳳麟。

東同年艾長人司寇

刑措於今三十年。還依北斗看長天。尙書履曳金門上。司寇風高武庫邊。自傍白雲千樹影。幾經赤棘半秋煙。曾聞舊有持籌略。今日猶堪定蜀滇。

公先條議屯田

送王子厚掌科請假

家學淵源道德尊。十年來去重西垣。拾遺補闕中朝望。莫謝蒼生獨閉門。

輓陝西提督陳忠愍公諱福

報國心丹義更加。軍中李晟敢言家。萬營熊虎銷秋氣。百戰風雲捲暮沙。刁斗乍鳴星忽隕。鬼神同恨雪爲花。邊疆定有忠魂助。莫爲將軍起嘆嗟。

是日異風大雪公遂被害

寄孫沂水太守

十載聲名貫耳頻。清操已信絕纖塵。雲中魏尚真無愧。海內吳公更幾人。頓起瘡痍成樂土。懸知沙漠見王春。心隨父老稱觥切。願祝年華與政新。

寄懷袁丹叔太守。聞其敦請黨冰壑先生講學。

廿載追隨屬爾賢。吾儒風味尙依然。時常搶攘惟宜靜。政以廉平自可傳。佇看河汾施教澤。願聞蒲坂種桑田。冰心一片君知我。兩地焚香夜告天。

爲吳銅川銓部兩尊人壽

瑩瑩冰鑒徹天曹。爲溯家聲羨鳳毛。柳拂琴泉春酒熟。雪明聖鼓婺星高。懸魚蚤佩先生訓。舞綵難酬阿母勞。比歲庭闈多勝事。丹書雙捧出神臯。

爲趙天羽戶曹尊人壽

海陽雲氣護幽居。杖履翛然燧火餘。綺里風流高斗極。香山耆舊拂霞裾。鳴琴再引庭前鶴。平準新傳膝下書。三鳳八龍真繼美。黃金白璧欲何如。

爲田子綸戶曹母節書冊

德水淵源接泗洙。鍾來閨閣匹名儒。田家母是真師表。海內人稱女丈夫。午夜篝燈酬地下。間關帶月撫諸孤。行年六十身方健。三鳳翩翩又引雛。

爲許浣月儀曹母壽

勞勞國計屬伊人。廿載離家憶老親。帝命權關兼覲省。天開餘閭應生辰。許母閨三月生。值今閨三月歸省。斑斕色對霞山照。菽水歡生歛浦春。況是冰霜昭大節。宜文膝下拜儒臣。

陳太翁出家穀賑饑鄉里德之賦呈說巖先生

古道何能遶。高風尙在今。痾瘵原素念。桑梓況關心。盡飽仁人粟。爭傳義士吟。貞珉書不朽。遍滿大行陰。

贈趙深庵侍御

十年經術重江東。藹藹春生撫字中。每向西臺讀諫草。秋霜依舊帶春風。

題葵翁長者小像

面有風光目有神。渾金璞玉是天眞。一堂六世身無恙。彷彿羲皇以上人。

程進士受業於兄第後乞言祝之遂嘉其友愛

元方領袖季方來。兄弟翩翩天下才。華萼集成符彩見。池塘夢得錦雲開。鳴珂夜入陪金馬。振筆秋高待玉裁。從此家聲推並美。文光應照紫霞杯。

送孫杞瞻學士歸省

暑到延和講未闌。如何輕去較書官。豈分章句移花影。自識星文入夜寒。倚闕青天雲五色。買舟赤石水

三灘百年黃髮高堂穩。肯向秋風理釣竿。

送柯素培通參歸養

海內遙看喉舌星。那知歸夢到西泠。簾吹楊柳千峯晚。舟度芙蓉半夜青。諫草只今留魏闕。詩筒何日報江亭。慈顏一笑天倫得。問罷平安好授經。

平涼歸降報至是日立秋

天威一播漢西京。納款軍門卽罷兵。千里轉輸民力息。萬家團聚將功成。臨邊祇見壺漿盛。不戰元因壁壘明。三楚九江應待命。秋風會送凱歌聲。

丙辰六月。司寇艾長人同年以退食槐聲十二詩見示。未及步韻。公逝矣。展讀絕筆。情見乎詞。仍以退食槐聲爲起句。次韻追和。並志哀輓。時七月中旬也。

退食槐聲聽不窮。翛然獨坐問秋風。平生志許青霄上。垂老心驚白露中。漫向亭前招放鶴。還來爨下拾焦桐。西園水石登臨遍。彷彿家園地幾弓。

退食槐聲度枕遲。風清月白幾人知。雲山極目增秋氣。砧杵千家動客思。北地自開文舉宴。南荒久閉伏波祠。夢中蝴蝶飛無定。莫向莊周辨是誰。

退食槐聲雨後清。長空幾度聽鸞笙。詩題滿壁疑多識。柯爛深山賸一枰。風度不矜天下士。笑談真見古

人情。朝廷立國崇寬大。約法潛消海內兵。

退食槐聲隔岸聞。北窗相對幾朝曛。綠深時見歸林鳥。塵靜方看出岫雲。欲寄遠懷虛鴈影。爲尋好友惜蘭芬。回思玉署同遊日。一派淵源一夜分。

退食槐聲近戶低。參差樹色總難齊。魚浮淺水羞吞餌。燕宿高林不啄泥。殘局幾時留客對。新詩一夜報君題。可憐讀易三更後。竟撤當年太乙藜。

退食槐聲雜晚蟬。西風忽散一林煙。星移物換人皆老。刑措兵消宦亦僊。魂夢久知隨氣變。吉凶豈有爲情遷。百年未了元無幾。不學長齋醉裏禪。

退食槐聲入暮涼。省南絲竹正鏗鏘。居然彌勒龕中坐。無復蛾眉鏡裏粧。碑記漫誇題玉殿。鼎湖元許侍先皇。陶家松菊歸來晚。卻恐歸來徑已荒。

退食槐聲隱落霞。夕陽笛裏淚痕加。高臺自引西峯月。石磴空懸北岸花。難報大官千粒米。但消仙掌一杯茶。江湖萬里波濤險。會待安欄好放槎。

退食槐聲何太頻。滄于一夢是根因。覺來緯地經天事。看破吟風弄月身。老大偏宜珠入掌。官貧卻笑桂

爲薪。胸中多少眞邱壑。不是黃山寫不眞。

法黃石同年先有和韻十二章

新愁西曹歲月催華髮。昨夜秋風欲白頭。
退食槐聲枉自多。茫茫理數果如何。晨興尙曳朝天履。奄絕誰揮返日戈。草木無情皆變色。弟兄有淚不成歌。行年五十生如寄。莫道前人是逝波。

退食槐聲聽乍稀。寢門猶望綠成圍。銘旌欲寫悲青練。車馬重來哭白扉。最念老臣封事歇。不爭遺像墨痕肥。夔龍好句千秋在。獨愧衰殘尙未歸。公詩有補天終俟夔龍友之句。

新秋慰法黃石同年時待補方伯

誰云蝸角是浮名。三十年中宦未成。歲月淹留蠹桂老。才華拓落鬼神輕。曾因侍從垂清問。會待藩臣佐太平。暑去秋來多病客。子虛重賦莫愁生。

送徐方虎編修假歸

江東人物望崔嵬。領袖文壇屬異才。八代衰靡千載振。九州風氣兩人開。謂方虎與元少也。侍臣蓮炬雍雍出。倦客仙槎款款回。計到家園秋正好。菊花籬畔讀書臺。

丙辰八月十五日秋分。是日陪祀夕月壇。

今年又看長安月。秋色平分此更均。節序驚心人易老。清光照眼事偏新。枕戈臥甲三軍瘁。轉餉輸租萬井辛。聖德齋明應默祝。良宵盡作太平人。

輓張東峯銓部卒於官妻封氏從之。

樸拙行藏世所無。問心亭上辨真儒。

東峯著有問心亭集。

千言砥礪遺書在。四壁蕭條旅櫬孤。吾道愈深廉吏痛。彼

蒼還念寡妻俱。相逢莫作牛衣泣。地下雙魂信已孚。

永訣時封誓不獨生。扶柩歸里縊死。

輓周伯衡舊掌垣以保舉卒於楚二首

南行珍重勸加餐。僕馬蕭蕭道路難。宰相薦賢非受賞。書生報國擬彈冠。幾年貧病軍前死。半世行藏鏡裏看。卻悔書來終未答。墨痕猶帶楚江寒。

自卜浮邱十畝居。知君久與宦情疏。衡陽烽火需才急。漢水風濤待命餘。一死未酬廉吏分。十年空上諫臣書。只今千里呼元伯。何處招魂駕素車。

送史彤右庶常假歸

春風蚤度杏花天。高步瀛洲正少年。菽水奉親情切切。文章華國意翩翩。何當病裏添書癖。且向山中補硯田。無限君恩須鄭重。莫教學士負花磚。

贈嚴灝亭侍郎

青瑣當年舊有聲。自慚同列復同庚。東南輸輓勞經畫。風雅文章屬老成。帝里筵開冠蓋盛。華堂春近雪

韓淨梁令王介初殉難名臨元。山東人。進士。

南州烽火接汀洲。照徹江城十二樓。誓與存亡惟一念。敢言名姓必千秋。英魂化厲消餘孽。父老吞聲望首邱。忠義昭然懸國史。不知遺骨有誰收。介初無子

題汪蛟門百尺梧桐閣圖

百尺梧桐閣。閣中有一人。讀書秋樹下。閱歷冬及春。司農爲我言。渭梁王立先生汪子志嶙峋。文章追大雅。孝友篤天倫。中心竊好之。欲見惜無因。今年來上國。鳳閣掌絲綸。退食一相過。對之如嘉賓。著書三四卷。調高情彌真。留君共晨夕。歸馬何駉駉。手持方子圖。堂前娛老親。海內息兵火。菽水際良辰。臨歧願有贈。珍重閣中身。

聞鄧都令李澹庵間道歸京師志喜

滿地兵戈膾一身。眉山何處葬忠臣。直攜琴鶴歸天子。夜夜間關望北辰。

壽衛年伯母八十兼贈澹足同年

太行縣互析城尊。堅貞之氣鬱德門。千峯萬壑遙相向。蒼松古柏映庭萱。我聞衛母年八十。森森蘭玉階前立。侍御舉觴先致詞。賓朋里黨一時集。憶昔侍御按江干。繡斧稜稜鐵面寒。首除豺狼狐鼠遁。清霜猶拂惠文冠。卻餽發奸溫旨下。南人遠送青驄馬。盛世胡爲側目多。廷臣淚向西曹灑。惟有慈顏不改常。敢

將無罪告君王。君王自雪孤臣枉。承歡膝下荷恩光。一粟一水天倫樂。是母是子心如昨。鄉邦都看婺星高。年年菊酒堂前酌。

繆歌起侍講齋中。聞史子修編修訃至。悼之。

旅館寒宵悵索居。幾從白下問雙魚。江帆渺渺孤舟歇。鴈陣蕭蕭雅社虛。上苑人悲朝露蚤。石交我感歲星疏。可憐逸少揮毫在。對酒招魂檢法書。

哭雲門老友

故鄉今失老成人。曾記來時八十春。王子相別我向夢中尋素友。誰從天際問孤臣。著書已副名山業。馮謫生刻雲門全集行誌墓應標太古民。雲門隱居不仕一望桑乾渾是淚。更無詩句過河濱。

丙辰除夕。同田子湄檢討。李天葩中翰。暨誠兒守歲一枝軒。感賦二首。

行年六十周花甲。鬢髮鬢鬢雪未齊。退食每餐燈後飯。朝天誤聽夢中雞。民生若此身難補。國計如何意總迷。爲語吾兒休獻頌。東南戰馬夜還嘶。坐消殘雪一盤辛。風物京華又報春。兄妹經離四五載。親知相對兩三人。行藏迂腐心無憾。歲月蹉跎學未真。獨累故鄉仁義叟。解衣推食意諄諄。

骨瘦筋衰六十翁。班行猶自綴羣公。無才祇覺君恩重。揣分安能國計充。民力艱難愁鬢裏。天心仁愛雪花中。朝家自有真劉晏。蚤濟三軍奏捷功。

贈張又南少延尉

社稷功高大將門。敦詩說禮有淵源。少年忠義由天性。萬里關河答聖恩。輦路共看儒者象。案頭常贈古人言。只今廷尉稱平日。純嘏應從一念存。

寄訊陳長卿

蔚署論文識大家。別來蹤跡各天涯。懷人每憶梁間月。展帙虛疑漢上槎。一榻冰霜安素節。三年烽火動悲笳。救時自愧無籌策。空使司農兩鬢華。

壽李恆嶽妻兄七十

公厚德大義。居鄉有陳太邱遺風。詩皆實錄。

有仁有義君子克勤克儉家風。夜聽讀書樓半。朝看種菊園中。族黨歡忻倚玉兒。孫次第攀龍。報道五花官誥。來封七十仙翁。是年得封典。

送張豫章孝廉歸華亭次元韻

熙朝羅駿築金臺。比歲方收天下才。器識元高千古上。淵源真羨一家來。每當風雨思張翰。倍喜衣裳學老萊。炎溽歸途須慎重。好音先寄隴頭梅。

輓同年王東皋侍御

病裏奔喪最可哀。三年空自望君來。移棺殮子萱闈在。繼祧爲兒墓碣開。一代共推真吏部。九重應念老西臺。舊遊誰與傳清白。門下康成次第裁。白仲調記公生平事。蹟付其家藏之。

次杜太翁過劉摯故里韻。卽贈肇餘少宗伯。

才也養不才。中也養不中。觀州有父子。千載溯流風。先生慕居正。此心此理同。我聞大人者。其初皆蒙童。譬如種嘉樹。培育無怠功。日深而月異。滋息安能窮。一經傳後裔。跨竈多豪雄。大儒侍講幄。忠愛答深宮。劉摯自賢達。過庭今媿隆。登堂拜前輩。仰止德彌崇。

哭申臬監處士

雪鬢顏顏病復頻。那堪哭友倍傷神。少微星隕憐高士。黃絹辭窮慟哲人。吾道未興諸弟憾。世家難荷兩兒辛。晚年惟有躬行切。悔不貽書細細論。

送同年冀公治大司空歸里

日日班行對老成。一談一笑古先生。大臣才斂惟思過。理學功深不近名。歸去友朋增氣色。晚年婚嫁漫經營。一時白髮同人輩。誰附尙書驥尾行。

送趙韞退分憲河北

頻年盡讀枕中書。握手相看愧不如。我輩道從文字合。故人情惜酒杯疏。中原燧火憂還大。萬姓瘡痍苦未舒。付託老成天子意。大河南去莫躊躇。

送衛爾錫檢討謫霸州判官二首

秋風秋雨暑難清。纔見伊人又送行。侍從登朝蒙勅旨。判官分職近神京。自來閒署文章貴。卻幸高堂杖履輕。我自衰殘如秉燭。相期努力事平生。襟懷蕭然金馬門。故人相對欲忘言。汨羅豈少懷沙賦。新建曾開何陋軒。弄月吟風皆聖學。乘田委吏總君恩。懸知再入承明日。吾道艱難國體存。

次寶坻相國韻贈顧秀才

菰蘆南望幾幽人。相國詩傳世澤新。彩筆爭看題鳳羽。青雲會送拂龍鱗。薊門客過三秋露。京洛途高九陌塵。老鬢顏顏常閉戶。識君何必面相親。

訪杜子靜侍讀

從容退食五雲間。一度逢君一笑顏。几上圖書常自檢。胸中城府已全刪。呼來白鶴依人下。夢到青山得意還。顧我勞勞何日暇。共談風月託清閒。

題羅太翁鄉賢錄後與振彝侍御二首

豫章昔日重三羅。千仞飛翔首泰和。家法於今誰可繼。鄉賢公在一門多。一派淵源祖德遐。椿堂懿行更無涯。汝南月旦高千古。卻在江南御史家。

寄懷施愚山少參

曾識宣城廿載餘。前身謝朓復誰如。胸藏海嶽詩成史。夢遶江山月滿廬。鄭魯人文思教澤。洛閩宗旨憶傳書。兵戈欲洗身猶健。莫使林間歲月虛。

哭閩督范觀公盡節。因讀畫壁遺稿二首。

風高范老舊家門。血灑巖疆報國恩。兩浙清名垂竹帛。八閩正氣塞乾坤。潮歸南海蛟龍泣。月上東華劍履存。青史千秋今日定。九重早已鑒忠魂。地下相從五十人。還因義士哭忠臣。魂依北闕家何有。命絕南荒志未伸。古壁雲封詩是淚。孤城霧起血爲燐。獨憐一片常山舌。今日猶堪泣鬼神。

送田子綸水部歸省

拜手陳情返舊廬。歸來特爲奉潘輿。千言倚馬詩才健。十載爲郎宦跡疏。舟過青山舒倦眼。花開幽徑賦閒居。承歡定識多清暇。海日瞳瞳好讀書。

王毓青至都留寓小齋山陰文端公冢孫。

閣老門庭勝國賢。兒孫清白遞相傳。何人有志依先隴。如子存心守硯田。劍路鳴琴曾幾歲。雲邊臥雪已多年。公餘正好談家學。滿地冰霜一榻懸。

賜食熊白口占恭紀十二月二十一日

熊肪截玉滿銀盤。賜與諸臣和蜜餐。啓事乾清風力急。歸來散盡雪霜寒。

送李獻陽之任甘州守戎

北塞名家世德高。秦川西去佩弓刀。長城自有將軍在。蚤息沙場百姓勞。

丁巳除夕贈劉瑞生爲余寫像

臘去春來歲序中。今年忽見兩衰翁。燈前對鏡疑非我。頰上添毫酷似公。起坐扶人腰漸直。笑啼隨衆耳將聾。劉生果是傳神手。再把心肝寫一通。

戊午元旦侍班候朝賀

御路霜痕接玉橋。千官鵠立侍清宵。雲中鳳輦籠煙出。仗外鸞旗拂曙飄。草木欣迎君子氣。梯航許入聖人朝。先是三年未受朝賀。征南廟算應先定。楚粵狂氛計日消。

送姜定庵之任奉天少尹

留都景物接神皋。此地應需侍從勞。雲舍望過龍塞遠。講堂開比杏山高。洪爐妙手回霜雪。鐵騎英風入

俊髦蚤晚著書須寄我。知君談理不談騷。

送張一衡歸侯官二首

四載窮交一榻留。對君真是對南州。從來忠告心無愧。幾度憂時淚欲流。道誼相關惟我輩。文章雅志必千秋。故人老矣成孤陋。纔賦歸與已動愁。城郭蕭條燧火餘。橫塘一望果何如。夢中兒女真相見。海上桑田尙可居。必子懸琴需歲月。少陵結伴捲詩書。孤帆萬里歸須早。出入應乘下澤車。

寄訊李厚庵太史二首

閩海由來禮義鄉。妖氛忽爾報猖狂。奴顏婢膝真無賴。大節孤忠倍有光。間道蠟書臣分在。中朝綸綍聖恩彰。平生學道今方用。自愧衰庸老侍郎。心戀彤庭出戶難。至尊久已鑒忠肝。綢繆鄉土休遺策。保護封疆豈晏安。爲抱椿庭千古恨。更憐苦塊一身單。生芻欲寄關河阻。靜夜題詩月色寒。

送潘藏山隱者

白髮蒼髯老鶴形。對君如對少微星。囊中舊草仁人贈。夢裏先祠孝子經。鳥語花開眞世界。男耕女織好家庭。山中服食誰能辨。不是黃精是茯苓。

法公子櫟秋捷爲黃石同年志喜。

東海春光幾百年。牀頭歷歷五經傳。兒孫解得真滋味。只守君家一硯田。

成我存寄詩見懷。用韻答之。

森森長江隔萬潞。三年思汝到於今。文章寂寞肝腸苦。藥石纏綿歲月深。吾道敢辭多事日。幾人能盡大
臣心。陰培元氣千秋語。兩鬢蕭然雪已侵。

廉吏行。慰法黃石同年喪子。

廉吏不可爲。善人胡報施。問天天難知。空聞人嘆咨。君家世德貽。乃父剛介持。才華不如誰。薄宦一身羈。
千人愛鬚眉。無米供晨炊。膝下發蘭芝。膝上弄含飴。昨歲失孫枝。今年損弱兒。弱兒髻甫垂。南北相追隨。
余旣識英姿。輒以乃父期。乃父笑而辭。書劍學皆癡。丹青寄遠思。異日將療饑。濡筆潑墨時。煙雲滿紙披。
安知歲月遲。不作老畫師。年來病不支。問視猶嘻嘻。妻孥地各歧。兄弟自怡怡。竊幸得良醫。乃父釋憂疑。
倏忽朝露危。路人且生悲。無棺函兒屍。父也命如絲。無身從父歸。兒也魂何之。古今數多奇。數定幾人移。
哭罷誦吾詩。廉吏不可爲。

送唐濟武太史歸淄川。兼懷高念東侍郎。

稷下奇人兩諫書。漢廷猶記被恩初。儒生面目千秋上。經術文章廿載餘。爲探西湖風物好。肯教北地姓

名疏。良師益友俱泉石。歸臥煙霞晚自如。

賜飲六安茶口占恭紀七月五日

秋風初動御爐香。茗椀擎來自尙方。弱質不禁清到骨。卻令腸胃煖如湯。

哭嚴灝亭侍郎

共著斑衣出掖垣。重來相繼拜君恩。一堂佐計惟軍國。廿載論交及子孫。庚甲相同予更老。文章不朽數何言。傷心天竺峯頭月。歲歲秋高照墓門。

哭蘇亮工少詹

獨有躬行實踐人。幾年相見倍相親。詞林歲月書中過。赤子胸懷世外真。正合東宮需碩輔。可憐北地失儒臣。扣門問疾君含飯。一痛歸來淚滿巾。

哭姚若侯大司寇二首

封章幾上帝王箴。寵眷頻年日復深。體恤民情天下望。調和國是老臣心。焚香夜告風云杳。曳履晨趨跡莫尋。聞道病牀勞聖慮。蓋棺猶自荷綸音。

先生病篤。蒙上垂問。再四遺疏復奉溫旨。

青蒲白馬舊相隨。三十年來是我師。一體痾瘼何處學。吾生迂拙幾人知。每看鬚鬢多霜日。豈意存亡隔世時。老輩凋零真痛哭。哭君還罷鵲鵲詩。

先生五弟小山君。客死中州甫兩月。

題鉅鹿刁公鄉賢錄後

畿南刁姓兩君子。俎豆方看此一人。鉅鹿儀型關世教。祁州道學接天民。幾回憑弔心難已。同日標題志未伸。詩句好存家乘後。他年驗我論人真。

壽同年益都相國七十

先生東魯之偉人。海岱靈奇備一身。正直剛大天所予。紫閣黃扉真帝臣。學本程朱宗孔孟。嫡派相傳惟主敬。曾讀先生偶拈吟。克己改過完至性。自慚愚魯失專師。同譜深蒙宰相知。手捧薦疏告天子。頓起田間匪阿私。兩奉徵書下金殿。養親不逮復何戀。力疾趨朝見至尊。已從柱下邀宸眷。當日辭家告祖宗。無才未敢步夔龍。此行若改清白節。何顏地下更相從。自入班行職業缺。登堂欲語羞薄劣。一年幾度問起居。獨見憐才心最熱。躬逢聖世資劬勤。吾君堯舜德彰彰。憂國憂民豈能恕。兵戈未息髮髮蒼。長安七度生申日。願爲天下祝良弼。一酒一蔬未敢將。矢報知己惟以質。午歲華辰登古稀。兒孫遶膝盡斑衣。我亦先生牆陰客。況依帝座望清暉。盥手一歌歌復頌。先生位爲朝廷重。以人事君道無窮。耕莘釣渭千秋用。

上賜紫貂披領朝服一襲恭紀

康熙十七年十二月三十日

臘盡彤廷肇曙暉。尙方擎出紫貂衣。綺文乍展雲霞爛。弱體親承雨露歸。手執憲綱勞帝簡。口傳溫語肅天威。是日傳旨。今年暫穿。明歲另製更換。聖朝補袞須賢佐。獨愧衰臣獻納微。

上賜御書唐詩一卷清慎勤格物大字各一幅恭紀有序

康熙十八年二月十二日。臣象樞奏事至中左門。時聖駕將幸南苑。閣臣傳旨。一切條奏本章。俟駕還而奏。臣以疏係參劾。不便攜回。捧至後左門請旨。隨蒙召入懋勤殿啓奏。上覽疏畢。因問臣籍貫及中式甲第名次甚悉。退仍立殿階下。侍讀學士臣張英。中書舍人臣高士奇。捧御書唐詩一卷。墨搨清慎勤大字一幅。格物大字一幅。賜臣。仍傳旨云。皇上因爾居官勤慎。每於啓奏之時。剴切詳明。不負職掌。此卷是習字所書者。並墨搨特以賜爾。臣跪受。奏言臣衰老無才。不克盡職。中心抱愧。何敢當隆恩厚賜。既轉奏。又命臣於殿旁展閱。臣跪展恭閱畢。奏言草書如龍飛鳳舞。楷書如北斗泰山。臣藏之私家。世世寶之。又轉奏謝恩。即命於殿前叩頭行禮。乃捧出。是日天顏開霽。垂聽殷切。愧無嘉謨。謬叨寵眷。臣不勝感而欲泣。其同入啓奏者。吏科給事中臣張鵬也。

衰年秉憲廁清班。啓事何堪動聖顏。內殿仰承天語降。侍臣雙捧御書頒。奎光燦爛瞻龍鳳。睿藻莊嚴望斗山。家世千秋傳至寶。恩波常記五雲間。

送黃俞邵奔喪南歸時以博學薦舉未與試

聞君辭母日。捧檄意遲遲。家有淵源學。人如冰雪姿。徵書千古痛。孝子滿朝知。草土餘生在。躬修自有爲。哭同年劉公愚大司寇

同榜同庚五六人。王東皋。壽白山。衛濬足。公及余也。年來相繼老風塵。看君鬢髮皆如漆。顧我頭顱半似銀。人物共推三輔地。勛名大著九江濱。君恩未報身先死。孤立朝端淚滿巾。

送儲廣期明府御試畢回清源任

重來獻賦謁皇畿。仙令雙鳬願已違。大雅文章真落落。古人模範自依依。人從玉署瞻龍袞。君合銅章讓布衣。聖主憐才多異格。種花滿縣載花歸。

次韻送田髯淵歸華亭

風雅如君世所知。廿年邱壑獨棲遲。人經貧病才逾老。交在文章道豈私。高論憂危同賈誼。新詩精妙比王維。輕帆畫舫蕭然去。正是名山著述時。

陳介眉編修以其尊人年七十請假送歸

君從吾道溯淵源。我羨君家碩德存。一派文章開正學。幾行蘭玉種衡門。鸞車秋引斑衣志。虎觀人沾紫誥恩。自有孔顏真樂在。海昌樓下細評論。時許典三令海甯講學。

送李天生檢討特予養母歸富平

華嶽雲深奉詔遲。陳情一表袖中隨。白沙風節公卿望。司馬文章殿陛知。寸草有心真報國。三公不易願爲兒。蔚羅曾與論經史。今日方看實踐時。

送于龍河歸文登

出入承明歲屢更。送君歸去不勝情。肝腸似雪眞朋友。骨肉相關比弟兄。負郭田荒三徑在。倚門親老一官輕。從今自守吾生拙。海畔鳬鷗總不驚。

送任海眉同年歸聊城

盛世朝陽有鳳音。侍郎歸去臥山林。退休合引孤臣分。棄擲終非聖主心。白簡凝霜科目重。秋曹執法鬼神欽。慚余衰朽言無補。檢點生平閉戶深。

讀陳賢母傳與介眉編修二首

大母芳懿久不磨。兒孫雍穆一門多。當年飽歷冰霜氣。及到而今是太和。
戮力陳家苦自茹。手中織紵口中蔬。何人一管春秋筆。採得芳名直大書。黃黎洲先生作傳

李省甫志平海寇代厚庵上疏畢復條陳閩事

閩海頻年未罷兵。何人慷慨請長纓。蠟書已達孤臣志。軍壘爭傳大戰名。賭墅高風同謝傅。籌時妙策駕侯生。廈門一掃鯨鯢穴。莫待封侯事乃成。

上賜魚恭紀四首康熙十八年五月初七日

西苑仙舟五日開。池邊網得錦鱗迴。至尊清宴思魚水。特詔廷臣自捧來。

滌釜烹魚薦祖龜。全家飽食豈無慚。君恩更欲推三老。扶杖臣家作美談。是日遯陳編修錫綬父。年七十歲。彭

楨父。年六十歲。同食魚

脰。三編修隨行與坐。

長安慣食五侯鯖。幾見烹鮮賜列卿。太液波光流處遠。願分東海一書生。膠州法若真足疾不能至。分一類食之。若真原官侍講。今候補布政使。

甯陵道學著前朝。誦讀遺書齒尙齟。燕喜堂中無俗士。爲詢家世一相招。時舉人呂前庚至。惠其曾祖坤所著呻吟語小兒語諸遺書。

再晤申觀仲

曾記西郊訪白雲。重來握手說離羣。長鬚大面新詩句。難弟難兄又屬君。

輓王思繩銓部

強項郎官久著名。蓋棺今日見平生。銓曹屢哭眞廉吏。前哭王東皋張東峯。不爲同心淚始傾。

輓易子然及門。用題獲鹿書院舊韻二首。子然。漢陽人。

易生歸里後。去住總無端。漢水東流急。黃河北望寬。夢從雲外斷。書向淚中看。寄語承家子。休辭跨竈難。拓落吾徒在。胡爲爾不留。文章真有命。民社豈貽羞。駿是燕臺失。財難楚國求。蹇予多老淚。又灑到西州。

輓王允大及門

頻年生死感同心。又哭東昌淚不禁。林下幾人垂素髮。朝中一老伴華簪。爾身無愧三遷教。吾道空懸六字箴。爲惜門牆零落盡。銘旌題到墓門深。

贈李映碧先生

前輩風流絕世才。每瞻山斗意徘徊。當年封事留金石。垂老躬修重草萊。人物已追三代上。著書元自六經來。詔求逸老雲深處。玉樹琳瑯菊正開。

除夕禁爆竹聲。閭巷靜甚。呼兒集字成詩。己未

坐守庚申欲賦詩。尊前消受夜遲遲。浮雲過眼繁華少。異變關心往事移。劍北將軍懸大陣。江南織女望新絲。三冬無雪休多慮。一詔如天四海馳。

上賜日講四書尙書解義各一部恭紀

微言大義總訏謨。何幸頒來到小儒。萬世心傳歸孔孟。一人道統接唐虞。興朝已肇文明治。聖訓還開正學途。信是編摩諸侍從。講帷深處有都俞。

上元月食救護太常寺

七政修明歲有推。今年月食上元時。蟾元暗引燈花照。陰體圓從火樹窺。伐鼓奉常昭聖敬。披圖太史驗天儀。歸來滿地笙歌起。眺眎盈虛總不知。

平蜀捷至志喜 庚申正月

將軍分路下西川。廟算從容出萬全。馬度陰平開鳥道。兵臨劍閣息狼煙。縱橫餘孽殲將盡。指顧南荒檄

自傳。沃土頻年生聚少。浣花今欲問桑田。

讀吳成甫先生傳感賦。沁州人。銅川大父也。

根深而枝茂。源遠則流長。天道有至理。人事循經常。我讀吳公傳。如入君子鄉。門祚遺清白。潛德自修藏。與物渾無競。傳家惟義方。一朝豐厥後。善氣發幽光。森然如玉立。食報何章章。俯首溯先澤。厚積頗相當。子孫榮簪組。所願致顯揚。公家賢吏部。垂紳立廟廊。體用備一身。太平資劬勩。吾生愧衰劣。斂衽銅鞮旁。贈葉訥庵學士。

侍從殷勞退食稀。頻年講幄佐垂衣。典謨久矣陳中道。爻象從茲進泰機。弼帝匡王臣子願。明天察地聖人微。丹心耿耿身常健。每撤金蓮夜送歸。

贈李鶴生令黔陽

送爾登車話幾端。仕途不比讀書寬。少年爲令心宜小。亂後臨官事更難。政績好將三字報。清慎勤也。部民直作一家看。川東歌頌隆隆起。豈獨高堂夢寢安。

喜許時庵孝廉就館

孝廉名已重西湖。秋水伊人物色孤。最愛文章追大雅。從知道誼接真儒。許典三同黃太冲講學海甯。時庵從學甚久。弟兄情切家風古。時庵兄弟六人共爨。家事稟命長兄。師友心通氣味殊。羅雀門庭無一事。高談莫笑老夫迂。

輓成我存及門仍用送別前韻

自荷溫綸下紫宸。班行惟賸老都臣。愁來書札慵難寄。讀到碑銘死是真。我存自作墓銘。有子安貧能守墓。無人問道可傳薪。丑闌佳話今已矣。理學文章信有神。已丑會闌。同人各期所拔士。或云可相。或云可將。或云可兼。房。同人皆喜。

七月四日蒙上賜藕恭紀

西苑芙蕖盛。根深太液平。薦新知聖意。分賜及諸卿。採處紅雲動。擎來白雪明。臣心同物類。節節荷生成。

七月二十八日再蒙上賜藕並蓮蓬菱角恭紀

藕大如船出御河。重來水殿沐恩波。虛中比德誰無愧。觸類清心感更多。菱角霜微真抱玉。蓮房粉墜不依荷。詩成未敢邀宸覽。拜手惟書喜起歌。

八月十九日三蒙上賜藕恭紀

秋水波光擁至尊。小臣鵠立聽潺湲。池邊露冷衣還溼。殿角雲開氣自溫。鳳口屢銜頒賜命。藕絲仍續再三恩。歸家報與妻孥說。異數頻頻下九闕。

八月二十七日四蒙上賜藕恭紀二首

三荷君恩賜藕回。紅門又拜一筐來。深秋水白多霜露。玉骨冰肌豈舊荄。

歸家卽啖兩三枝。血脈調和肺腑宜。溼露丹砂都是幻。衰年屢受聖人醫。

恭送仁孝皇后孝昭皇后梓宮歸山陵

萬國臣民失母儀。連鑣結隊哭靈輶。霓旌拂柳青猶黯。蘆殿堆雲白欲垂。坤德並留懸日月。幽宮長閉守熊羆。難將聖主關雎化。撰作天家薤露辭。

辛酉二月二十五日。隨駕詣昌瑞山謁孝陵恭紀。因述愚悃志哀。

一表陳情辭至尊。鼎湖龍去望陵園。

樞於順治十七年。疏請終養。次年在籍。隨州守哭臨。

千秋史筆書鴻業。四海人心頌舊恩。複道

松楸煙翠合。石門翁仲夜雲屯。追隨玉輦橋山哭。猶愧當時列諫垣。

二十七日隨上祭孝陵恭紀

虎踞龍蟠接薊遼。宏開寶域護唐堯。在天靈氣憑依久。積日精誠典禮昭。國祚永瞻山體靜。君心常抱孝思遙。神來降鑒烹蒿意。雲外諸峯向北朝。

三月初七日隨上辭孝陵恭紀志哀

薊門西望望皇畿。共侍鑾輿展謁歸。禮罷祫門雲自合。夢回虛殿淚重揮。老臣將去填溝壑。何日重來拜翠微。廿載承恩無寸補。鐘鳴漏盡尙依依。

康熙辛酉季春上駐蹕馬蘭峪召扈從諸臣賜觀湯泉應制賦詩四首

氤氲佳氣藹陽春。一鑑中涵應聖人。浴日全歸千尺水。分流合潤九州民。晴煙曉覆行宮樹。夜雨先清輦路塵。自是君恩時下濟。餘波渥處及衰臣。大壑層巒抱碧隈。名泉勝蹟近蓬萊。山龍隱躍徵文物。地德溫和帮助壽杯。雲擁翠華巡幸出。星高水殿問安迴。慈宮頤養多嘉悅。孝治端從聖主開。萬國溫涼總帝功。石根焦釜有無中。千峯巖壑南薰繞。一派澄清太液通。畿輔冰霜皆變化。漁陽草木倍沖融。至尊聊掬甘泉水。不是行遊五柞宮。陽和滿地豁重陰。詔錫臣工次第尋。甃石四圍池貯水。傍巖千樹柏成林。橋山弓劍瞻依切。葑屋桑麻擁護深。不比華清傳勝事。吾皇舉動萬年箴。

營中雨

銜哀小駐薊門東。急雨瀟瀟野帳中。帶溼炊煙艱午食。嘶羣老馬怯春風。纔知甲士從軍苦。竟有書生扈蹕雄。早晚重裘還覺薄。今宵定減杏花紅。

病

瘦體由來是弱軀。諸公雖老不如吾。千山躍馬峻嶒入。半夜提燈宛轉趨。恐失追陪心震動。時當退食意憂虞。睿慈傳諭頒醫藥。疾痛呼天未敢呼。

帳外看山

山光著雨倍精神。四望雲巒不可親。何樹何花何古寺。有猿有虎有高人。扶筇易辦尋遊具。伏枕偏愁臥病身。日日開門如故友。何須握手話風塵。

哭曹子步妹丈四首 辛酉五月

頻年骨肉屢傷殘。又報凶音淚不乾。老去歸家同輩少。幾人門外整衣冠。前秋看月在京師。握手談心月影移。一日分襟成永訣。悲來添我鬢邊絲。吾衰未得作閒身。幾度書來問老臣。檢取墨痕依舊溼。茫茫竟是九泉人。死生婚嫁事多端。處置都如切己看。一片熱腸還未冷。夢中猶自話艱難。

康熙二十年七月二十一日。上御瀛臺。召滿漢內閣九卿及翰林科道部曹五品以上官員。特賜筵宴。兼頒彩幣有差。恭紀二首。

宵旰頻年靖四方。禁中開宴繼明良。樓船渡處天顏喜。水殿吹來王者香。雨露共沾珍錯異。禽魚宛助笑言長。太平景色秋將稔。還見宸衷慮旱荒。

時下令大同捐米備荒。

久綴班行負至尊。頻叨寵賚感殊恩。日邊霞出堆文錦。水際雲開降聖言。被服難忘天府貴。朝參頓使老臣溫。自慚躬遇垂裳主。惟願祥刑頌九閭。

壽魏相國貞庵同年辛酉

丙戌題名四百也。榜下看花盡走馬。最老最少不數人。大抵三二十者。屈指於今四十春。滿頭霜雪筆難寫。甌卜綸扉四先生。惟公一人在綠野。綠野高風真罕聞。內修黃庭外爾雅。濂溪愛蓮公愛書。弄月吟風自瀟灑。頻年著作已等身。閉戶一編手還把。文富登朝尚未歸。司馬坐待耆英社。我在金門羨老翁。歲歲兒孫進玉斝。

贈歸孝儀修撰

曾因一面識端人。實踐躬行事事真。不愧榜中名第一。公門收盡上林春。

贈劉子端中翰

朝班新識面。江左久知名。儒雅追先正。端凝見老成。憐才心獨苦。秉鑒眼偏明。自足邀純嘏。年年春酒盈。

贈杜肇餘少司寇

同心同事白雲曹。每坐公衙愧二毛。贊助衰年惟正氣。歸依大雅有詩豪。借才還比司銓重。公先任少宰種德何辭執法勞。幾欲登堂申舊好。難酬日日飲醇醪。

哭畢方伯亮四同年

負耒躬耕百畝寬。此身生死在雲巒。誰從海內知班馬。我向山中識范韓。萬卷遺書皆手澤。千秋佳話一

清官重來應詔傷遲暮。不是中朝薦士難。

輓王少參近微同年辛酉十一月

山城別緒尙依依。十載身遠道不違。病骨全消恩縣貌。徵書徒掛墨莊扉。固知觀化隨天數。未得加餐待友歸。哭罷高平還哭汝。傷心不爲故人稀。畢亮四同年先公三月卒

送馮再來少司寇迎母櫬歸台州

趨朝待漏每相從。半載西曹對古松。執法共瞻紅日近。銜恩頓遠白雲封。多承苦口開愚直。細讀新詩見協恭。九折峯頭回首望。班行惟賸一衰慵。

平演捷至志喜辛酉十一月十四日

昆明萬里捷飛傳。宵旰殷憂已八年。赫赫王師遵廟略。巍巍聖德格皇天。輸將乍歇思休養。疆域重開望保全。率土謳歌臣有頌。久安長治道無偏。

送錫伯長兄歸里壬戌二月

霜鬢垂垂老弟兄。重勞策蹇入春明。田園無恙心何憾。手足多殘淚欲傾。浹月都中看景物。何年洛下會耆英。歸家步履須珍重。歲歲平安慰我情。

贈李葆甫

家世清溪產大豪。才名直並海雲高。晴窗有月窺書帙。野樹無枝掛戰袍。龍性難馴知我貴。鶴情自遠任人褒。閬山應問蘿山老。點綴朝班愧二毛。

送汪舟次翰林冊封琉球二首

風教遙通萬國深。小邦恭順感宸心。定知天子懷柔切。北望星辰聽玉音。大海樓船一葉孤。水光雲影盡皇途。經過島嶼題詩處。勒作天朝問俗圖。

寄送許子位辭官歸里

當年嘉定今聞喜。共是循良傳裏人。名世文章天下望。救時經術宰官身。天留國士肩吾道。我爲皇家惜老臣。兩袖清風歸去矣。平生祇贍一清貧。

送張敦復學士請假葬親

崇儒重道太平年。宣室常邀雨露偏。帝鑒久知人似玉。都人共信品如仙。恭承錫類昭純孝。近侍彤墀屬象賢。前席暫虛應有待。莫煩聖念到龍眠。

懷汪鈍庵編修

應召身猶健。歸田志已堅。時清容閉戶。道大在編年。松菊雙蓬鬢。乾坤一釣船。名山千載事。歲月正悠然。康熙二十一年奉命巡察直隸等處地方恭謁世祖山陵。

稷恩一慟鑒臣心。長別橋山慟益深。康熙二十年二月。隨駕謁陵。慟哭長別。自傷良老。有老臣將去填溝壑。何日重來拜。聖微之句。雪鬢自知成讖語。樗材

那計捧綸音。重過蘭峪山峯迴。不似紅門萬騎臨。前過紅門。扈騎屯擁。不能入。後飛馳始到。先帝貽謀今日盛。低頭追念倚松陰。

展謁畢。三臣共坐松下。感當日功勳及山陵佳勝。

巡行過北平登孤竹堂望夷齊廟有感

孤竹何崔巍。兩裔高千古。仰止夢魂間。有懷常欲吐。安得陟山巔。瓣香頭一俯。告我希望聖心。難濟蒼生苦。懷懷對簡書。汗下渾如雨。此行負朝廷。愆尤何日補。遙望乞神靈。相助驅豺虎。灤水自無波。澄清在畿輔。

巡行至山海關擬登澄海樓觀海未果

東海具大觀。觀者眼界廓。平生未見之。汪洋那敢度。天子命巡行。首在恤民瘼。駐馬問雄關。民貧俗不薄。長塹護金湯。北門慎鎖鑰。帝王以德興。設險猶如昨。南有百尺樓。欲登步先卻。登高非吾願。臨深豈所樂。古署獨徘徊。目無風濤惡。四海況澄清。自潮還自落。拜手贊皇輿。愧我咨詢略。

巡行出居庸關望蔚有感

雄關一入傍金門。十載何曾問故園。郭外屏山還掩映。城邊壺水可潺湲。親朋漸老垂霜鬢。手足多殘泣夜魂。欲藉皇華過祖墓。敢因私事褻王言。

巡行駐宣鎮書院讀梁眉居秦聖俞兩夫子遺詩今俱作古人矣愴然感賦

當年文戰此闌中。桃李栽培荷兩公。驚賓敢言空冀北。余大小試。謬叨兩夫子首拔。鳳鳴卻幸附河東。再瞻題句心增感。回想師門道不窮。五十餘年承簡命。重來故里一觀風。

巡行駐保定拜謁楊椒山先生詞

不與先生出處同。此心切切仰高風。生來直氣天難折。謫後良辰命不逢。兩疏萬言真大罪。千秋一日是孤忠。先皇表出余應拜。駐馬低頭入廟中。

過慶都縣拜謁堯廟

立極開天萬古思。皇都咫尺見伊祁。傳心遠肇神孫歷。享帝先追聖母祠。堯母廟在縣內。漠漠荒階存舊土。森森古柏長奇枝。堯下兩柏參天。左一本三幹。右一本五幹。土人題曰三皇一本。五帝同根。歲時香火多耆舊。可是康衢擊壤遺。

過新樂縣次壁間韻

新樂爲名苦更偏。孤城落日幾炊煙。關山彌望春風掩。車馬時通古戍連。一路問農無雪信。前宵聞鴈過雲邊。朝廷自有憂民詔。莫慮今年似去年。壬戌歲邑以雹災邀饑免。自冬迄春復無雪。民有憂色。

捉虱行

大造茫茫渾一理。號物之數紛難紀。山有虎豹海有蛟。害不及身何足齒。胡爲四肢百骸間。日日切膚生虱蟻。夜來纔睡睡忽醒。白日亂嚙痒到髓。有時公堂手自捫。擲之地上猶不死。我欲大索淨根株。呼僮代

我我心喜。一翻一覆。作意尋尋。來尋去。徒爾爾。小者弋獲。大者驚。少留一縫。潛藏裏。從來狡兔有三窟。搜羅又恐傷衣被。自悔吾家針線疏。更緣積垢離清水。或云捉者非其人。坐令此輩長孫子。於今莫怪常處禪。大蠹難除類如此。

過真定觀大佛

吾儒在德不在像。大人全體那可量。計身不過七尺長。三才都在一肩上。如何佛氏太莊嚴。一火鑄成七八丈。從來芥子藏須彌。我大物小反增障。昔日耳聞目未經。同來古寺聊相望。人傳建造自隋唐。金身直立言非妄。看罷方啜老僧茶。西廊又看轉輪藏。目不及瞬轉已週。腐人頓覺心神曠。古今晝夜及死生。大抵皆如輪子樣。此日間僧僧不知。但云經卷此中放。大笑一聲騎馬歸。題詩恐惹禪和謗。

過趙州柏林寺觀吳道子畫水

幾筆神光閱世多。忽疑滄海又疑河。蓮舟一葉何人渡。壁上空留萬頃波。

巡行過順德父老遮道陳疾苦口占以示之二首

烽火連年事遠征。輪蹄絡繹此中行。於今廟算銷兵後。女織男耕自太平。頻年災沴不成秋。土薄沙深滿地愁。最是聖朝多軫恤。一天雨雪下邢州。

巡行至大名事竣將回保定

纔過淖沱又渡漳。天雄南望水茫茫。山連亶岫初添黛。柳近淇園略放黃。市井豺狼多斂戢。閭閻日月頗舒長。歸途惟願沾春雨。好寫民風報聖皇。

康熙癸亥仲春。巡行回保郡。復馳慶都行在。恭迎聖駕。是日仰承溫諭。兼賜免隻。紀恩一律。簡命同膺歲已移。歸途先報聖明知。鋤奸城社秋霜肅。問俗郊圻化日曦。碌碌因人真自愧。平平竣事本無奇。何當天語褒嘉重。況復恩承置免詩。

與李丹麓西曹

聲名久著大河濱。知是循良傳裏人。閱歷兩曹書上考。相期努力作名臣。

寄懷張豈文年家

聞道陳山有大豪。當年意氣比雲高。於今認得身心事。撒手游行總不勞。

送張耳黃孝廉歸省

道心全與世情疏。月照藤窗一卷書。歸去好酬真菽水。北帆遙望菊花初。時館余寓。

聞郝雪海中丞遺疏至。傷之。用南征百律。蘇州韻。

召入榆關是壯年。早朝騎馬手垂鞭。玦環都頌天王聖。鼎鑊方成御史賢。磊落文章時最忌。嶢嶢氣骨我相憐。冰霜絕塞曾無恙。生死茫茫桂嶺天。

康熙二十二年九月初四日。蒙上召至乾清門。垂問病狀。並所服藥餌。奏畢。隨賜人參膏一瓶。人參二斤。臣象樞自愧衰庸。何當曠典。感而欲泣。恭賦紀恩。

老邁何堪肺病攻。九重如日鑒臣衷。承將天語歸元氣。賜得神苗出大東。五色雲生黃袱裏。一團春在錦囊中。隆恩千載真難報。慎保餘年附亮工。

二月朔日病中示誠兒時在蔚葬亡媳七首。

乾清門下肅天威。頃刻昏迷萬事非。豈忍哀鳴辭聖主。病臣只合乞骸歸。余請告疏上四日。

傷心西去淚如何。汝到關門我病尙。甚矣吾衰身未死。此番省汝淚多多。

訪得長安三四醫。都來診視有同辭。勞勞費盡心中血。參朮歸苓次第施。

曾買新墳地幾弓。好將結穴問王翁。王盛臣也。雙肩一擔何時放。放下肩來到此中。

營葬兼因省墓來。松楸幾樹拂雲栽。吾家真與無家等。惟有祠堂盥手開。

報國無能敢問家。蕭蕭兩鬢客京華。親知也有頭先白。似我衰年病復加。

太倉老米白蔬盤。兩碗能消一日餐。計汝蚤歸應慰我。晨昏待汝問平安。

送崔玉階宮詹歸里

歸路輕搖一棹春。行年五十作閒身。晨昏問罷高堂上。依舊攤書閉戶人。

壽孔母陶太夫人

千秋慈孝聖人家。嗣續升官女德遐。公輔稱觴師內則。不知今日有繁華。

書謝氏表烈集後

康熙十五年。耿逆叛。邵武兵變。生員謝光惠母蔣氏。妻楊氏。同赴池水死。

一女事一夫。萬國戴一主。大義不能忘。亂賊安敢侮。謝家姑與媳。指水矢千古。我欲渡樵川。池邊爲撮土。拜此巾幗人。羞與偷生伍。

輓于北溟總制二首

簡命深叨聖主知。臣心精白總無私。清風亮節高千古。吏治民生濟一時。寢食能忘宸翰重。死生難報賜金慈。巖疆賴有斯人在。何事驚傳箕尾騎。生與同庚性不殊。居然三晉兩迂儒。憐君盤錯身應瘥。顧我膏肓病未蘇。南望江河誰復輓。北瞻雲日總難呼。當年薦草曾聞否。歷盡平生一語無。

輓直撫格公

澄清畿輔愧庸才。曾共先生攬轡回。古道居然追往轍。冰心真可絕纖埃。堂前有母頭仍黑。膝下無兒墓已開。雙淚不禁還過慮。朝中誰繼此人來。

輓宋開之少保

一官到處是芳蹤。律已清嚴奉職恭。久矣銓曹無愧色。近來司寇有憂容。貧居京國忘三徑。老死家鄉戀九重。獨坐若留公在世。剛方復見海剛峯。

琉璃廠見白鸚鵡有感

生不同凡鳥。羽毛亦自奇。冰壺曾照影。玉樹必臨枝。豈爲能言出。何妨衆眼窺。秋雲高漠漠。是爾入林期。別祖以牧親丈。

孝友門庭善氣多。書聲鶴唳總天和。關心道義終難恕。風雨殷殷在蔚蘿。

八月十七日啓事乾清門重蒙天語垂問病狀紀恩

用壬子閏七月初七日引見原韻

力疾趨朝傍玉關。諸曹啓事正臨軒。瞻依共識天顏喜。翼方避暑回鑾慰問親承聖語溫。橋外穿雲衣帶潤。樓頭望日面迎暎。晨起大雨尋復晴心肝如舊身空老。已愧今生報主恩。是日草疏再請告辭

送湯荆峴學士巡撫下江

秀才任天下。仁者體萬物。物逸而我勞。分內不遑恤。昔日侍講筵。天子重經術。今日守封疆。帝心特簡出。江南風甚囂。江南民甚絀。維風道先倡。愛民蠹先黜。吾性秉真剛。無欲誰能屈。但得百姓歡。安問權要怙。余也愧衰殘。十弊口難述。臨歧贈一言。懷抱慎憂鬱。

九月二十二日陸辭蒙諭入朝三次。是日賜大內湯飯。

召起登朝後。鵷班十二年。每思心向日。難報德如天。請急絲綸渥。瀕行雨露偏。尙方傳賜食。敢擬大烹賢。

二十四日再入陛辭蒙賜茶

知遇三生幸。年華二豎侵。頻來瞻殿陛。歸去臥山林。乘傳恩光異。臨軒存問深。天漿斟玉盃。滴滴入臣心。

二十六日三入陛辭蒙賜御筆特書寒松堂扁額聖製古北口詩復召入內殿垂問病狀賜坐賜茶

戀戀瞻依切。殷殷錫賚重。天章題右塞。御墨灑寒松。捧出羣工羨。懸來不世逢。宸顏雖日遠。伏臘對山龍。

十月二日出都承諸公郊餞

去國心難恕。徘徊馬首遲。真逢宵旰主。況際太平時。老病天應鑒。行藏世不疑。二疏千載盛。薄劣又重追。

十日過東莊晤妻兄李恆嶽先生

已入壺川地。先過長者門。扶人應再拜。愛我總忘言。鬢白顏如舊。山青德自存。草堂容二老。相對說皇恩。

十二日抵蔚

是日微雪忽晴

此是吾家矣。兒孫報我回。堂邊紅日照。谷口白雲開。老輩親朋少。餘生藥石培。漫言身勇退。原自愧鶩駘。

十七日恭懸御筆

里巷都瞻仰。歡然起頌聲。從知天子聖。益覺老臣榮。寶篆垂家範。山堂受令名。史官曾載筆。一日記平生。

起居注詳紀顛末

二十日焚黃祭告先祠

歷官三十載。綸命已重申。祖德原無愧。君恩又一新。薦揚勞宰執。義氣感高親。今日依先隴。纔完魏氏人。



箋詩柳秋人山洋漁

錄輯源祖王

漁洋山人秋柳詩箋

本館據天壤閣叢
書本排印初編各
叢書僅有此本

序

余自束髮受漢魏唐宋古今體詩於先大夫。每於古人寄託遙深之旨。必再三講論。俾心無所疑而後已。一日。課及漁洋山人詩。於秋柳四章曰。此借秋柳以弔明亡也。亦未分晰指示。嗣讀伊戒平會心偶筆。覺於山人微意所寄。亦未能窺其底蘊。蓋蓄於心者幾十年矣。丙午秋。應試歷下。與二三知己。買舟游鵲山湖。見柳色蒼然。披拂於波光夕照間。不覺百感交集。似於憔悴煙痕之句。有所微會。旣而見家戟如兄案頭有李瀛客先生秋柳詩箋解。披閱之下。實獲我心。攜歸抄錄。藏諸故篋。丙寅春。都門閑居。爲兒子輩講論古今體詩。因檢出繕錄一帙。並將精華錄箋註探入。付之剞劂。公諸同好。皆同治丙寅清明日也。東海王祖源識於天壤閣。

漁洋山人秋柳詩箋

東海後學王祖源蓮塘氏輯錄

秋柳四首并序

昔江南王子感落葉以興悲。金城司馬攀長條而隕涕。僕本恨人。性多感慨。寄情楊柳。同小雅之僕夫。致託悲秋。望湘臯之遠者。偶成四什。以示同人。爲我和之。丁酉秋日。北渚亭書。

按先生年譜。順治十四年丁酉。是年二十四歲。

秋八月。游歷下。集諸名士於明湖。舉秋柳詩社。又先生棠棣堂詩集序云。順治丁酉秋。予客濟南。諸名士雲集明湖。一日。會飲水面亭。亭下楊柳千餘株。披拂水際。葉始微黃。乍染秋色。若有搖落之態。予慨然有感。賦詩四章。又先生漁洋詩話。余少在濟南明湖水面亭。賦秋柳四章。一時和者甚衆。後三年。官揚州。則江南北和者。前此已數十家。閨秀亦多和作。陳伯璣曰。元倡如初。寫黃庭。恰到好處。諸名士和作皆不及。

秋來何處最銷魂。殘照西風白下門。他日差池春燕影。祇今憔悴晚烟痕。愁生陌上黃鸝曲。夢遠江南烏

夜村莫聽臨風三弄笛玉關哀怨總難論

註

金榮精華錄箋江淹別賦黯然銷魂者惟別而已矣。○屈復注李白詞西風殘照漢家陵闕。○古樂府楊叛兒暫出白門前楊柳可藏鳥。○又李白詩何處最關情烏啼白門柳。○惠棟注張敦頤六朝事迹李白金陵白下留別詩驛亭三楊柳正當白門下。○詩邨風燕燕于飛差池其羽。○屈注陽春曲楊柳垂地燕差池。○段安節樂府雜錄黃鸝曲太宗定中原所乘戰馬後征遼馬斃上歎息乃命樂工撰此曲。○徐夔注與志海鹽南三里有烏夜村晉何準所居也一夕羣鳥啼噪準適生女他日復夜啼乃穆帝立女爲后之日。○屈注烏夜啼臨川王義慶所作也。○屈注世說桓粲三弄而去。○徐注王之渙詩羌笛何須怨楊柳春光不度玉門關笛有折楊柳曲。○屈注折楊柳樂府橫吹曲也。

解

李兆元箋此先生弔明亡之作。第一首追憶太祖開國時後三首皆詠福王近事也。太祖定鼎金陵故入手先以白下門三字點明其地用意可謂微而顯矣。不然先生之賦秋柳在歷下水面亭何取于白下而遠引之乎。卽引用白下亦豈宜作此鄭重寔點之筆乎。殘照西風已隱寫一亡國景象。第五句以唐太宗比明太祖追憶業創之艱而傷後人不能繼也。烏夜村者后之所居按明紀洪武元年立妃馬氏爲皇后。后嘗謂上曰方今豪傑並爭雖未知天命所歸以妾觀之惟以不殺人爲本人心所歸卽天命所在及冊爲后上謂侍臣曰昔太宗長孫皇后當隱太子構隙之際內能盡孝謹承諸妃消釋嫌疑朕素爲郭氏所忌或以服御爲獻后先獻郭氏慰悅其意卒免於患殆尤難於長孫皇后也是太祖之創業馬后佐助爲多至神宗時挺擊一案詞連鄭貴妃嘉宗初移宮一案嘉宗聲明李選侍之罪以爲既殿崩聖母又威挾朕躬有垂簾聽政之意選侍乃鄭妃私人而福王係鄭妃之孫南都立福王是原與嘉宗莊烈相水火者故復用逆璫之黨重興復社之獄自底滅亡而實自鄭妃播弄階之厲也故詩并及此夢遠云者追憶開國母后之德而傷後代無嗣音也。結句玉關哀怨則以春光之不度比明社之難復眞覺黯然魂銷矣。○相尹吹笛用金陵舊事也其地名邀笛步言外有風景不殊河山異代之感。○三四句予初以寫景略過津門沈秋瀛明府云三四

句當緊承白下門說。第三句春燕影。用建文中童謠。莫逐燕。逐燕日高飛。高飛入帝畿。以燕比燕王也。春者歲之始。燕王靖難。在明朝開國之初。故曰春燕。他日指靖難時。言靖難後。移都燕京。以金陵爲南都。堯池云者。已經一番變革矣。第四句今字。指福王失國後。言亡國之慘。更烈於靖難。故曰憔悴晚烟痕也。此二句實就金陵前後喪亂之事說入。以起下追憶太祖開國之意。於明朝世事。更爲完備。余聞甚喜。亟附識於箋後。嘉慶戊辰孟秋。

娟娟涼露欲爲霜。萬縷千條拂玉塘。浦裏青荷中婦鏡。江干黃竹女兒箱。空憐板渚隋堤水。不見瑯琊大道王。若過洛陽風景地。含情重問永豐坊。

註

詩秦風。白露爲霜。○屈注。劉禹錫楊柳枝詞。千條金縷萬條絲。○何良俊世說補。江從簡少時有文情。作采荷謠。以刺何敬容曰。欲持荷作柱。荷弱不勝梁。欲持荷作鏡。荷暗本無光。○屈注。陳後主三婦豔詩。中婦臨粧臺。又中婦蕩蓮舟。○古樂府。黃竹子歌。江干黃竹子。堪作女兒箱。一船使兩槳。得娘還故鄉。○司馬光資治通鑑。自板渚引河入汴。又自大梁之東。引汴水入泗。達于淮。又發淮南民十餘萬。開邦溝。自山陽至揚子入江。渠廣四十步。渠旁皆築御道。樹以柳。○先生自注。借用樂府語。桓宣武曾爲瑯琊。○劉義慶世說。桓溫自江陵北征。經金城。見少爲瑯琊時所種柳。皆已十圍。慨然歎曰。木猶如此。人何以堪。攀枝扶條。泣然流涕。○古樂府。瑯琊王歌。瑯琊復瑯琊。瑯琊大道王。○范攄雲。漢友議。白居易有伎樂素善歌。小蠻善舞。嘗爲詩。櫻桃樊素口。楊柳小蠻腰。年既高邁。小蠻方豐豔。因柳枝詞以託意。有永豐四角荒園裏。盡日無人屬阿誰之句。屈注。永豐坊在洛陽。

解

此爲福王作也。首句虛寫一南都將亡之象。次句比福王之不能自振也。三四句指馬阮輩。言嘆輔佐之無人也。蓮爲君子花。而但餘青荷。有羣小得位。君子消亡之意。中婦鏡刺其昏暗。不能補益君德也。竹亦應有勁節。而無如竟成黃竹。只可供女兒箱之

用。讀其以聲色逢君也。在朝之臣若此。南都安得不亡乎。第五句以隋堤水比之。蓋以福王徵歌選舞。有類煬帝耳。第六句。初看似節取桓溫北伐一事。嘆南都馬阮輩並溫之弗如。然溫在鄒那。不過爲內史。何以遽用大道王語。雖曰借用。不宜不倫若此。按晉書。鄒那王睿生於洛陽。南渡後。爲晉中興之主。福王亦生於洛陽。立于南都。而一年遽亡。較之鄒那。其始相類。其終大不相侔。則知先生所謂借用者。雖因宣武而借用樂府語。是因樂府語。而用晉鄒那以例福王也。且晉五王渡江。而鄒那中興。號稱東晉。明季亦有五王。無一能中興者。句中不見二字。寄慨深矣。如此看來。不但本聯中空憐不見四字。調義實注。且與下洛陽云云。尤爲一線穿去。末二句。用找補法。言南都之事。已不堪回首。誰復更向洛陽始封之地。而致其懸弔乎。點明洛陽。詞旨愈顯。伊戒平云。若字當作誰字解。良是。○永豐坊。用洛陽舊事。乃節取移植禁中之意。比福王以藩邸播遷。而驟膺大寶也。小變事無涉。

東風作絮糝春衣。太息蕭條景物非。扶荔宮中花事盡。靈和殿裏昔人稀。相逢南雁皆愁侶。好語西烏莫夜飛。往日風流問枚叔。梁園回首素心違。

註 劉熙釋名。糝。相黏黏也。○三輔黃圖。元鼎六年。破南越王。于上林苑中起扶荔宮。以植所得奇草異木。○南史張緒傳。劉俊之爲益州刺史。獻蜀柳數株。條狀如絲綫。武帝植于靈和殿前。嘗賞玩。咨嗟曰。此楊柳風流可愛。似張緒當年。○釋智匠古今樂錄。西烏夜飛者。元徽五年。荊州刺史沈攸之所作。○吳均西京雜記。梁孝王游于忘憂之館。集游士。各使爲賦。枚乘爲柳賦。○乘字叔。

解 此爲南都遣老諸公作也。東風作絮糝春衣。卽第七句所謂往日風流也。次句。物換星移。人世變遷之感也。三四句承上句景物非來。伊戒平云。蓋滄桑之感。云亡之痛。兼之矣。最爲得解。相逢南雁皆愁侶。正指遣老諸公。好語西烏莫夜飛。卽以我國家奉天

承運代明復讐。闕獻餘孽。胥已殲滅。不必復效沈攸之妄興恢復之兵。自取敗亡也。按資治通鑑。宋荊州刺史沈攸之。以蕭道成篡位。舉兵東下。聲罪致討。頓兵郢城。兵潰而亡。西烏夜飛者。其東下時所作也。結二句。追念往日。有不堪回首之歎。

桃根桃葉鎮相憐。眺盡平蕪欲化烟。秋色向人猶旖旎。春閨曾與致纏綿。新愁帝子悲今日。舊事公孫憶往年。記否青門珠絡鼓。松枝相映夕陽邊。

註 謝靈運樂府集。王獻之妾名桃葉。其妹曰桃根。子敬嘗臨渡。歌以送之。曰。桃葉復桃葉。渡江不用楫。但渡無所苦。我自迎接汝。又桃葉復桃葉。桃樹連桃根。相連兩樂事。獨使我殷勤。○徐注。王粲柳賦。覽茲樹之豐茂。紛旖旎以修長。屈注。李白愁陽春賦。何重楊旖旎之愁人。○春閨。暗用王昌齡閨中少婦不知愁絕句。○徐注。魏文帝柳賦序。昔建安五年。上與袁紹戰于官渡。時予始植新柳。自彼迄今。十有五載矣。感物傷情。乃作斯賦。屈注。楚辭。帝子降兮北渚。目渺渺兮愁予。○按徐引文帝柳賦。亦爲帝子而牽引也。○漢書。陸弘傳。上林苑中大柳樹。斷枯臥地。亦自立生。有蟲食樹葉。成文字。曰公孫病已立。按即宣帝也。○徐注。古樂府。楊叛兒歌。七寶珠絡鼓。教郎拍復拍。黃牛細犢兒。楊柳映松柏。

解 此首專爲福王故妃童氏作也。按明紀補注。童氏。周府宮人。逃亂至尉氏縣。依福王子旅邸。生一子。已六歲。福王南奔。各不相顧。福王即位。陳潛夫奏妃尚在。福王不召。後自越其杰所詣宮。弗納。旋下錦衣衛獄。童氏在獄中。細書相遇日月及離別情事。甚悉。付掌獄馮可宗呈覽。棄不視。可宗辭審。福王命屈尚志嚴刑拷掠。斃之獄中。先是。福王命錢謙益採訪淑女。王居禁中。惟漁幼女。飲火酒。雜伶官演戲爲樂。首句桃根桃葉。正指其得新寵而行樂也。次句言任童妃之流落而不召也。三四句言今日雖棄置弗顧。而妃自來叩闕陳詞。是不啻秋色向人猶旖旎也。春閨曾與致纏綿。則正指旅邸相依。兩情纏綿時也。第五句愁字。悲字。亦暗包妃至弗納。旋復下獄情事在內。而不忍斥言。是詩人溫厚處。帝子。原指湘夫人。今指童妃。徐夔注引魏文帝柳賦序。大悞。第六

句直以宣帝詔求故劍大義責之。調刺雖切。而措詞微婉。尤得風人之旨。末二句重複追憶當年。以深悼之。妙在詎否二字。直向福王心中下一棒喝。故與第四句意相應而不相覆。○第一首夢遠句。追憶馬后。見開國之如彼。末首悼傷董妃。見亡國之如此。照應在有意無意之間。關雎爲西周之始。白華爲西周之終。先生此詩命意處。直接三百篇。世推爲風雅之宗。夫奚疑。

